

## Dochs Gras werdd immer wachse

Wenn merr spaziern gehe dut dann begeecheent merr so monchem Zeitgenosse. Unn wenn der dann moont er misst stehe bleiwe und e bisje babbele, nor weil unserooner Guten Dach gesacht hott, doo kann merr schunnemol soi blau Wunner erlewe.

So iss merrs om vorsche Sunndaachmoie unne om Moo gonge: Doo kimmt merr enn ältere Monn, also so ooner in moim Alder, mett Hut unn so nordische Spazierstecke entgeeche, bleibt steh und sacht: Schönes Wetter heute.

Ich wollt nit unhöflich soi, bin aach stehegebliwwe unn habb zur Ontwort gewwe: Es iss werklich enn scheene Daach. Unn weil der Monn nit weidergehe wollt saach ich noch: Awwer mir hadde joo dissjohr iwverhaupt koon Winter, unn weil merr dess de Erderwärmung ze verdonke hawwe, misse merr endlich was degeeche mache.

Oh Gottogott, doo hadd ich was gesacht. Weil doo iss der Monn joo fuchsteifelswild unn zimlich laut worrn, alser mich fast oogekrische hott: Schon wieder einer, der solch einen Unsinn glaubt. Die Zeitungen sind voll davon, unsere Politiker überfallen uns mit Vorschlägen, was wir alles tun und was wir alles lassen sollen, dabei hat es solche Wetterkapriolen schon immer gegeben. Schon immer gab es große und kleine Eiszeiten, schon immer gab es Warmperioden. Und jetzt auf einmal, nur weil die globale Temperatur um winzige Zehntel Grad gestiegen ist, soll der Mensch daran schuld sein? Wegen dem bisschen Ce-O-Zwoo in der Atmosphäre? Dass ich nicht lache. Glauben Sie mir, mein Herr, dagegen ist überhaupt nichts zu machen, das ist die Natur, deren Beständigkeit allein im Wechsel liegt. Wir Menschen können nichts dafür, wenn in Grönland bald die Zitronen blühen, und wir können auch nichts dafür, wenn bald wieder Eisberge im Mittelmeer schwimmen. Doch das Gras wird immer wachsen!

Unn dann hotter soi Stecke uff de Bodem geknallt unn iss abgehau. Unn ich habb doo gestonne unn war baff. Denn erstens hawwe mir die Worte gefehlt unn zweitens war kooner doo, dem ich se hätt saache könne.

Dann habb ich iwverleecht, weil von dene Leit, die genau dess saache, was der Monn gesacht hott, gibt's joo vill. Dess merkt merr immer dann, wenn im Fernseh odder so denooch gefroocht werdd, was ze mache wär, wenn dess werklich so wär mett dere Erwärkung, unn doo iss immer die Mehrheit defür, nix ze mache, weil erstens alles schunnemol doo gewese iss unn weil deshalb zweitens nix degeeche ze mache iss.

Ich werr mich also umstelle misse. Ich muss nit dess glaawe, was e paar dausend Wissenschaftler zeh Johr long erforscht unn zesommegetraache hawwe, ich muss aach nit glaawe, dass die Gletscher in de Alpe unns Eis in de Arktis weeche unserm Energieverbrauch schmelze. Unn wenn werklich die Eisbärn om Aussterwe sinn, dann halte merr e paar von dene e paar Johr im Zoo iwver Wasser unn lossese bei de nächst Eiszeit wider frei.

Unn deshalb glaab ich ab heit, dasses schunn nit so schlimm werdd mette Erd. Weil alles was die Natur mächt ihr Gutes hott. Denn wens e bisje wärmer werdd sparn mir Gas ferr die Heizung, mir brauche koo neie Wintermäntel unn aach koo Frostschutzmittel im Scheiwewischwasser mehr. Unn was mir doodorch sparn, kenne merr ferr Sonnenschutzmittel, Mickespray unn Chinin geeche die Malaria ausgewwe. Ess werdd also so schlimm schunn nit werrn. Unn iwverhaupt, was mach ich mir Gedonke, schließlich bin ich joo nimmi de Jüngste, unn wens werklich so kimmt wie ich noch gestern gedenkt habb, iss iwver mich schunn long ess Gras gewachse. Eiern Honnes